

## Im Lift

Mit em Lift, da chunnsch vill schnäller usem 5. Stock in Chäller  
Oder bis in Estrich ue, druck de Chnopf und d'Tür gaht zue  
Druck namal, mir bliibed dine, ussert eus mues niemert ine  
Euse Lift isch euses Zimmer, aber was isch das? Jetz simmer...

Im Lift stecke blibe, im Lift stecke blibe  
Er isch grad no ggange und jetz simmer gfange  
Im Lift stecke blibe, im Lift stecke blibe  
De roti Chnopf dörfsch nöd aalange!

Hei-ei-ei, jetz simmer i däm Lift, wo sich kein Millimeter wiiter bewegt  
Well me kei andri Lüüt aatrifft, ghört me numme das wo me sälber redt  
Mir sind älle, aber immerhin zwei, mir chönd eus gägesiitig underhalte  
D'Angscht abeschlucke, uf alli Chnöpf trucke  
Vilicht gits ja en Notstromschalter

Du bisch z'schwär, s'isch ja käs Wunder!  
Nei, vom Gwicht här simmer drunder und uf kän Fall überlade  
Isch's ächt en Motoreschade?

Im Lift stecke blibe, im Lift stecke blibe  
Er isch grad no ggange und jetz simmer gfange  
Im Lift stecke blibe, im Lift stecke blibe  
De roti Chnopf dörfsch nöd aalange!

Mer chönnted luut schreie, ich will nöd abgheie  
Me mues eus doch ghöre hinder der Türe  
S'isch wie'ne dunkli Gfängniszälle,  
Mir müend sofort de Abwart useschälle!

Clopfe, poldere, göisse und pfiife, irgendöpper mues doch begriife  
Mir mached Lärme da im Schacht, well de Lift kän Wank me macht

Im Lift stecke blibe, im Lift stecke blibe  
Er isch grad no ggange und jetz simmer gfange  
Im Lift stecke blibe, im Lift stecke blibe  
Ich ha ganz e schlächti Bewärtig gschribe!

Uuii, bin ich froh, de Huuswart isch cho  
Dä weiss was mache, dä cha das scho  
D'Tür gaht uuf, aber eis cha der säge:  
Ab jetz nimm ich immer d'Stäge!

